



Ўзбекистон – Хитой: ХАМКОРЛИКНИНГ ЯНГИ УФҚЛАРИ

Ўзбекистон
Республикаси
Президенти
Шавкат Мирзиёев
Хитой Халқ
Республикаси Раиси
Си Цзиньпиннинг
таклифига биноан
23-25 январь кунлари
давлат ташрифи билан
ушбу мамлакатда бўлди.



МУШТАРАК МАҚСАДЛАР ИФОДАСИ

24 январь куни Пекин шаҳрида Ўзбекистон Республикаси Президенти Шавкат Мирзиёев ва Хитой Халқ Республикаси Раиси Си Цзиньпиннинг расмий делегациялар аъзолари иштирокидаги музокаралари бўлиб ўтди.

Ўзбекистон ва Хитой етакчилари кўп қиррали ва ҳар томонлама стратегик шериклики янада кенгайтириш масалаларини кўриб чиқдилар.



ЎЗБЕКИСТОН — ХИТОЙ ИНВЕСТИЦИЯ ФОРУМИ

Хитой Халқ Республикасида давлат ташрифининг ишбилармонлик тадбирлари доирада Ўзбекистон Республикаси Президенти Шавкат Мирзиёев Гуандун музофоти партия кўмитаси котиби Хуан Куньмин билан биргаликда Шэньчжэнь шаҳрида ўтаётган қўшма Инвестиция форумида иштирок этди.



ЖИЗЗАХ ВИЛОЯТИДА ЭЛЕКТРОМОБИЛЛАР ИШЛАБ ЧИҚАРИЛАДИ

Давлат ташрифининг ишбилармонлик дастури доирасида Ўзбекистон Республикаси Президенти Шавкат Мирзиёев Шэньчжэнь шаҳрида Хитойнинг етакчи "BYD" компанияси бош қароргоҳи ва технологиялар марказига ташриф буюрди ҳамда компания президенти Ван Чуаньфу билан бирга Жиззах вилоятида йилига 50 минг донга гибрид ва электр автомобилларни йиғиш бўйича лойиҳани ишга туширишга бағишланган тантанали маросимда иштирок этди.

Йўл бўшат, замона!
Йўл бўшат, жаҳон! –

ЎЗБЕК КЕЛАЁТИР...

*Яна хаёл узра ташбеҳлар хил-хил,
Бир пайғом васлига талпинар дадил.
Илҳом парисининг хушхабаридан
Сархуш сандугочдай яйрамоқда дил –
Ўзбек келаётир тарих қаъридан!*

*Асраб наърасини, янғроқ сасини –
Қадим Хоразмнинг хазинасини,
Икки ярим, уч минг йиллар наридан
Опичлаб Авесто дафинасини,
Ўзбек келаётир тарих қаъридан!*

*Бир қанот – Алпомиш, бир қанот – Широқ,
Бир ён – Алп Эр Тунга, енгилмас тупроқ.
Ўт олиб мангулик самандаридан,
Тўмарислар қалбин ёритган чироқ –
Ўзбек келаётир тарих қаъридан!*

*Даҳосининг сонсиз меваси билан,
Самарқанд, Бухоро, Хиваси билан,
Қанча тош битикнинг ўйиқ бағридан,
Шошга тенгдош бўлган шеваси билан,
Ўзбек келаётир тарих қаъридан!*

*Азалдан заковат нурига ёлчиб,
Зулматларга ирфон ёғдусин сочиб,
Туриб, туну куннинг туташ еридан,
Не-не сайёралар, қитъалар очиб,
Ўзбек келаётир тарих қаъридан!*

*Чиқариб нурафшон йўлга карвонин,
Бошига қўтариб тенгсиз сарбонин,
Куч олиб истиқлол зафарларидан,
Яна юлдузларга тақаб нарвонин,
Ўзбек келаётир тарих қаъридан!*

*Йўл бўшат, дилларда музлаган армон!
Йўл бўшат, менсимай хор қилган нодон!
Яна минг йилликнинг тонготаридан,
Йўл бўшат, замона! Йўл бўшат, жаҳон! –
Ўзбек келаётир тарих қаъридан!*

Акиф БАҒИР,
озар шоири

Ҳа, ўзбеклар шундай келади. Бу миллат қандайдир одамлар айтганидай, кеча пайдо бўлган эмас. Унинг тарихи жуда қадим ва шонлидир. Ўзбеклар инсоният тарихидаги илк империяларни қурган ёвқур ботирларнинг, дунёга йўл кўрсатган жаҳонгирларнинг авлодларидир. Балки бу миллат узоқ вақт маҳзун бўлгандир, ҳаққи топталгандир. Аммо бугун у оёққа турди. Ҳаққини сўрайдиган қудратга энди. Жаҳонга барча билан баробар, барча билан теппа-тенг сўз айтмоқда. Бунинг Президентимизнинг куни кеча Хитойга амалга оширган давлат ташрифи ҳам яққол ифода этди.

Ташриф давомида Пекин шаҳрида Шавкат Мирзиёев ва Си Цзиньпиннинг расмий делегациялар аъзолари иштирокидаги музокаралари бўлиб ўтди. Икки давлат раҳбарлари Қўшма баёнот имзоладилар. Ўзбекистон Республикаси Президенти Шавкат Мирзиёев Хитой Халқ Республикаси Давлат кенгаши Бош вазири Ли Цян, Халқ сиёсий маслаҳат кенгаши Бутунхитой кўмитаси Раиси Чжао Лэцзи, Осие инфратузилмавий

инвестициялар банки президенти Цзинь Лицзюнь, Хитой Экспорт-импорт банки раиси Ву Фулин билан учрашув ва музокаралар ўтказди.

Ташриф чоғида ишбилармон доиралар вакиллари билан ўтказган учрашувлар, уларда эришилган келишувлар, имзоланган ҳужжатлардан англаш

мумкинки, ушбу ташриф стратегик ҳамкорликнинг янги истиқболли йўналишларини белгиловчи аҳамият касб этмоқда.

Самарали мулоқотлар, истиқболли ташаббусларда эса икки халқнинг муштарак мақсадлари — келажак орзу-умидлари, тараққиёти ва фаровонлиги ифода топди.

...Ҳа, ўзбек шундай келган. Унинг шавкатли ўғлонлари мудом миллат шонини улуглаш, Ватан тараққиётини юксалтириш йўлида ақлу заковатини, шаҳду шижоатини аямаган, қалб кўрини бағишлаган...

Икки мамлакат ўртасидаги савдо-иқтисодий ва инвестициявий ҳамкорлик жадал суръатда ўсиб, кенг қўлам касб этмоқда. Хусусан, кейинги йилларда ўзаро савдо ҳажми икки баробар кўпайиб,

**2023 ЙИЛДА РЕКОРД КЎРСАТКИЧ —
14 МИЛЛИАРД ДОЛЛАРГА ЕТДИ.**

Хитой сармояси иштирокидаги
**КОРХОНАЛАР СОНИ
УЧ БАРОБАР КЎПАЙДИ.**

Суратда Ўзбекистон Республикаси Президенти Шавкат Мирзиёевнинг Хитой Халқ Республикасида давлат ташрифи билан йўлга чиқиш лаҳзаси.

Фото: president.uz



